

湖

上

集

徐魯庵先生湖上集序

昔周之衰而文日盛其盛之極樂於
揜貞然非必有淫冶蕩性之辭与奇
袤頗堅不根之論老子猶思及之曰
大丈夫處其實不居其華吾夫子亦
持之曰文侔吾尤人也而逡巡焉巽

於躬行君子之後而歟其不可逮夫
文者經世大業而不朽盛事豈曰以
其小而弁髦之彼小夫世之所為文
而文者不究其所繇來而又不底其
終之用以為就其一切之造而已則
豈唯老子之矯枉過其正以吾夫子

將有不能忍於耳目者今天下號為
治平無事不衰周若其民廢干戈之
業而稱詩書委蛇揖讓於尊俎衿裾
間隄二百年而文亦因之其文之盛
稍舒而為色澤則必探六雄援先秦
据東西京而裹其要領束而調五音

則又祖命騷禰揚馬友于建安黃初
之雋庶息顏謝又東而加偶然必放
而歸乎開元大曆之數其又佚而出
之牽聯淪胥月露之為響而任沈溫
邢之為組然且囂曰吾寧有蝕三
寸毫而不就墨吾不為宋氏也計天

下之所為盛者毋如嘉隆間嘉隆之
所為盛毋如江左江左毋如吾吳郡
而郡之巖邑曰吳江吳江之雋曰徐
晉庵公公成進士讀中祕書出補夕
拜司諫諍於嘉靖之年不二載輒謝
去退而耕吳江之埜天下豔於公之

名而竊意其所撰著必有當於所謂
盛者而公獨不然公生而亡他嗜顧
獨嗜書於書嗜六經乎史而尤邃於
易及三禮諸聖賢精神心術之微公
皆為能探隱破的而後筆之於書
成而郡邑之衿裾少年或不能盡好

之然必不以其一日之好而易吾守
公為人恂恂長者其出處多避少進
寬然置其身於不爭之地而善藏之
然間有所持論則必務於信其見而
不諧俗如表讓而賢朱均立統而屈
趙宋辨王正而歸周曆標吳祀而徙

范蠡即令湯禹之徒操尉牘自謂推
見至隱讀公辭而有不吐舌歛手者
哉不然以公之避跡謂孤隋且忘世
者迺其叙論郵道江左徭役抑何忠
厚懇至而達國體也且夫公詎不能
華非惡夫華而力去之唯欲寃夫文

所繇來而底其終之用而已盖嘉隆
之後曰萬曆諸大臣用事者固憂其
盛之極足以孽衰而數見於公車之
詔曰寧木毋蕉吾所貴士大夫於明
理適用而已然則公雖沒不獲盡伸
其言要必有合哉如苟以吾郡之所

謂盛於嘉隆間則已矣三所事公與
吾叙矣公諱師曾字伯魯其歿也郡
之父老諸生將舉而祀之學宮

時萬曆辛巳秋嘉議大夫前都察院
右副都御史西京大理太僕寺卿同
年生王世貞撰

湖上集目錄

卷之一

賦

述志賦

刺舟賦

梅花賦

蚊賦

四言古詩

有鳥

橫山

河上

苗碩

樂府

朱鷺

思悲翁

艾如張

上之回

擁離

巫山高

將進酒

君馬黃

芳樹

有所思

關山月

釣竿

折楊柳

平陵東

隴頭水

表忠祠祭祀歌辭

五言古詩

感懷四首

齋中讀書用康樂韻

閒居效陶體

初至虎丘山房作

題李掌教松栢長春卷

丙子六月作

七言古詩

鞦韆

趙別駕惠龍鬚席賦謝

辛未新正試筆

軒轅鏡

丁丑歲紀異

卷之二

五言律詩

旅懷

寄送劉先生謝長興教諭歸閩中

宿磚河驛

末夏同諸公讌集吳鴻臚池亭席上贈朱

戶部

壽醫士浦民惠五十

送教諭吳先生致仕還進賢

早秋

淨音爲瑞光寺僧賦

送鄒大峻卿赴舉

送費二懋莊赴舉

送曹大伯明赴舉

送沈大价甫赴舉

送徐大子文赴舉

送周二仲仁會試

渡同川阻風宿顧侍郎祠下

遣家僮入山採薪二首

送孔司訓先生掌教賓皇

風急

別業雨中遣懷

前詩有輞川之句感而再賦

送舅氏之任松陽

贈能上人

燈下讀書

贈傳神師

志山爲凌五賦

過華嚴寺詮上人院用周太宰韻

友人惠鵝

八石詩爲錢山人賦

鄒三起東挽詩

宜興喜得太平謝大甫解希文二同年書

兼懷李子化

龍湫

君陽洞

玉潭仙院拾鶴翎偶賦

送陳僉事督學廣西

送王判官赴沅州二首

題侍郎康公風木圖

崔教諭壽詩

竹泉爲慶成王世子賦

題廬陵王翁復齋

詠太液池鴈

寄題李貢士杏山書屋

送楊鴻臚伴送琉球使臣至閩中便道觀

省

送陸二十八同年出守潮州

遊金澤寺

贈崛峯僧

贈應醫士

同羅龐二使君同年太虛樓燕集

送魏三敬之給事奉使 冊封兼捧 恩

命歸省

劉文安公考終十詠

王晨觀

送施衛幕赴松門

題吳山圖壽吳明府兼賀得子

友人攜榼之湖濱燕集

金山寺

海嶽樓

守恒詩

虎丘千頃雲

雨霽登山

舟中賤誕張四子華以瑤篇見祝敬用奉

酬

重過治平寺謁三賢祠徑多落葉因誦唐人黃葉前朝寺之句遂用爲韻五首

法華集
目錄
立春見雪二首

鯉湖詩爲沈山人賦

贈閩中遊客鄒仙峯

題南昌萬地師訪譜卷

壽近竹袁封君

新正三日與翁大攜榼尋梅梅尚未開詩

以問之

授產論兒并示此詩

春雪

懷山詩贈施大

題瑞芝徵孝卷贈御史邵公

壽黃法師六十

顧刑部道行以潁墅別弟詩見寄奉和

甲戌交年作

訪真緣上人不值

代人題譽髦吳士冊

得友人書

送人貶蜀

湖上偶成四首

奉答周公瑕見贈

再答公瑕集唐句

詠芸草

沈文學懋時廬墓

嘲醉人

星槎詩贈王生

題畫賀朱山人得孫

陳節婦趙氏六十二壽詩一首

喜得第二孫

雨中自遣兼懷石感恩

卷之三

七言律詩

避暑別業

訪萬嘉定同年

送趙文灝分教元城

題寒塘宿鴈圖

寓虎丘修縣誌陸大以詩見寄次韻奉酬

昌平劉水西先生壽詩

奉使出都城留別省中僚友

宿定興公署次壁間甘刑部同年韻

次栢鄉瞿廣平同年見訪兼有青萍之贈

走筆肅謝

駐順德贈別謝省長

留簡劉順德同年

沙河道中見流民感而有賦

過呂公祠

弔盧生

晚入邯鄲城

渡漳河

贈鄭山人

次彰德盛上舍見訪有贈

壽南潯紀翁八十

壽醫士王君七十

送魯司訓轉官澧州不赴謝歸

壽華嚴寺祖芳上人六十

重過圓詮師院和姜丈夢賓韻

荻塘詩贈紀貳尹

丙寅元旦作

橘泉詩贈醫者

送蘇貳尹同年轉令黃陂

送李丞之任武陵

已巳春得考察報自述

與山詩贈陸山人

葉大順父赴社吳興贈以紵舄并賦此詩
送柴司訓遷諭費邑代人作

寄壽岑紹興

壽魏鴻臚六十閩人求

弔按察副使楊君

繳補禮科部檄并疏乞休簡何文選方考

功

齎奏人還得貴州學使吳明卿書卻寄

顧刑部以詩集見遺因贈

送顧刑部之京

甲戌立春日集長兒張仙會友

乙亥元旦作

宿雲汀念公房有贈

悼葉山人

壽韓君六十

弔盧貢士

過友人看菊留酌

壽凌君

贈浙人李近山

題杏林賜宴圖贈陳學諭

夢與客席上分詠得骰子覺而記之

送邑掾盛惟剛滿考東還

湖上聞得第三孫有作

喜得第四孫

吳封君挽詩三首

戊寅歲夏涼

濬河後觀長橋二首

賀馬君封郡理

張文學來韶書齋盆池植碧荷夏月盛開
顧吏部過賞爲之寫圖一時題詠頗衆
文學持以見示謾賦一律

賀沈體道受封

壽蕭君六十

題鴻麓隱居圖贈無錫華君道弘

代人題畫壽周太守

壽詹錄王成伯六十

嚴大子春挽詩

申文學子純以圓詮和尚挽詩見示邀予

同賦

追挽鈕貞甫

虹臯詩贈馬大

贈薄川費君榮壽

送烏程令羅君入覲

卷之四

五言排律

桐野詩

禁城新柳

張兵部生母袁太孺人表節詩

送顧建寧之任

誕日舟中作十六韻呈二三知己兼請垂

和

題長橋圖二十韻贈別李教諭

壽陳司訓

題朱公遺烈卷

送石司訓遷令感恩

借集周州守園亭因寄十五韻

七言排律

送龔行人同年奉使河南

座上各賦一器得寶劒

移舟北津遲邵御史作此奉呈

壽沈署丞七十

許州太守周君六十壽詩

五言絕句

答廬山人

遠山

題孫山人畫扇次韻

橫山

看雲

新墓望書莊

書莊望新墓

中秋聞笛

秋夜紀夢

懷友

七夕

讀秋杜有感

中秋聞鴈

弔楊憲副沅蕩阻風

中秋無月舟中作二首

閨怨二首

墓上種松

宿寒山寺下

過勝墩

被薦書懷二首

過梅堰

秋蚊

詠扇

詠瑟

渡北麻漾

七言絕句

詠昭君八首

贈賣茶者

莊居夜半聞寒鵲聲枕上口占二絕

送何教授表兄還藩府

朴齋詩贈徐大

逸齋詩贈徐二

坐客偶談近時貪人多爲丹客所敗會有

持畫仙求題者賦此應之

送邢貳尹赴昌平判官

題杏花賜燕圖

沈二一鳳寫竹見贈并貳以詩次韻西頭合

摘槐花

登高

梳頭

客有欲出塞者賦此沮之

喜亡友子登科

閱科場時義有感

弔周倉官

過殊勝寺

詠舟幔

過八斤

詠申生

詠屈原

詠荆軻

詠戾太子

詠陳子昂

代人壽黃道士六十

雜言詩

雪夜同麗兵部同年集楊鴻臚宅

題蘭亭圖贈楊鴻臚

題牡丹圖

卷之五

奏疏

酌處川兵殺掠事宜疏

請爲故蘇松兵備叅政任公立祠贈官疏

乞養疾疏

再乞養疾疏

乞致仕疏

再乞致仕疏

重乞致仕疏

卷之六

書

上座主茶陵張尚書書

與南太僕主簿許元復書

與胡秀才書

與孫諭德文和書

荅趙淮獻書

再與趙淮獻書

與巡撫張公書

荅王成伯書

與光州喻上舍書

與文掌教休承書

卷之七

論

朱均論

老子論

列子論

莊子論

孟子論

廣謚論

驛傳論上

驛傳論下

均賦論

均役論

吾道一以貫之論

卷之八

序

送徐縣丞序

送秦武康序代人作

牧越議略序

世講會錄後序

臨川王氏文粹序

重修六科仕籍序

賀封淑人吳母劉氏壽序

賀劉母都太孺人受封序

重刊半江集序

世統紀年序

贈醫士沈施卿序

顧中父集序

壽郡侯徐母周太夫人序

垂虹敘別圖詩序

正蒙章句序

壽顧母周太孺人七十序

趙淮獻詩集序

禮記集註序

文體明辯序

贈馬君榮壽序

壽布政使雨泉先生陳公七十序

經絡全書序

歷城少尹虹江金公七十壽序

南麻徐氏族譜序

卷之九

雜著

春王正月說

三高三忠祠議

熠燿辯

解讒

讀方希古豫讓論

壽研銘

曾子贊

朱子贊

趙夢蘭先生像贊

吳封君像贊

自贊

阿屏贊

書驛傳均役論後

卷之十

記

賓山記

吞海樓記

重修寧境華嚴寺塔院記

大浦橋記

吳江縣重建公堂記

吳江縣黃墓村觀音菴新建像閣記

瑞鹿堂記

卷之十一

碑文

吳江縣重建四橋碑文

桐鄉縣石門鎮新建勉齋書院碑銘

吳江縣重建總收倉碑文

卷之十二

墓誌

生母凌氏壙誌銘

處士時省潘先生墓誌銘

黃先生同妻鈕氏合葬墓誌銘

董士希妻吳氏繼金氏墓誌銘

貴州布政司照磨沈府君墓誌銘

亡姪十四郎壙誌銘

先母王氏墓誌

周母鍾孺人墓誌銘

太學生張公墓誌銘

楊處士妻平氏墓誌銘

太學生周叔元墓誌銘

郡學生朱世程墓誌銘

河南新鄉縣知縣致仕陳君妻顧孺人墓

誌銘

處士張克濟墓誌銘

處士周敬之夫妻合葬墓誌銘

河南都指揮使司經歷沈君墓誌銘

贈奉直大夫定州知州潘公夫妻合葬墓

誌銘

廣東感恩縣令石君元配鍾孺人墓誌銘

蕭世高墓誌銘

南京光祿寺良醞署署正吳公墓誌銘

杭郡學生龍石查君墓誌銘

封太宜人王母仲氏墓誌銘

墓表

處士嚴子春夫妻合葬墓表

卷之十三

行狀

先考訓科府君行狀

湖廣按察司副使沈公行狀

傳

吳封君傳

卷之十四

祭文

祭黃姨母文

同邑縉紳祭李教諭繼室齊氏文

祭座主高相公文

祭光州喻侍郎文

祭南皮湯封君文

同年祭吳布政使文

祭石司訓夫人鍾氏文

年家祭吳封君文

同邑縉紳祭周孺文及聘妻項烈女文

祭周孺文項烈女文

年家祭葉老夫人文

祭封太宜人王母仲氏文

年家祭吳封君發引文

同邑縉紳協祭王太母黃夫人文

祭龐光祿文

湖上集目錄

湖上集卷之一

大明吳江縣縣人曾

賦

述志賦

眇余生之孱弱兮苦貞疾之纏綿嗟抱志而莫
酬兮聊憑辭以重宣相先民之不朽兮託三事
而流傳吾何有一於茲兮死速朽而猶慙道德
文章本在我兮唯功業斯繇天咎怠荒之爲疾
兮視肺腑而尤堅惜青春之不我與兮忽已至
乎衰年胡不及時以精進兮擇可修而勉旃歲

冉冉其邁往兮恐來者之逾速欲繼日與待旦
兮望前修而奔屬余將先行而後言兮踵君子
之芳躅縱無勞於斯世兮庶免吾生之碌碌吾
初至夫大皇之壑兮隨鵬鳥而翱翔仰雲霄之
迴邈兮怨飄風之長迺斂翮而下墜兮旋吾
返虛舊鄉舊鄉之曲有桑梓兮可遠世以自藏
豈岐山之奧邃兮無棲伏之鳳皇雖棲伏亦何
傷兮終然異乎犬羊被錦羽以爲衣兮啄梧實
以爲糧聊相時而寓處兮冀康娛以徜徉非高
舉之無志兮愧羽翼之不強望閭闔而延佇兮

吾焉敢忘 君之厚德寒時命之弗順兮欲馳
驅而靡及儻鯁官而苟祿兮孰與虜力耕而自
食思 皇恩之未報兮吾唯勉修庠素職覽六
籍而允蹈兮姑弭節而志抑幸溝壑之未填兮
或斯文之可及朝聞夕死其靡悔兮容少懈於
一息本躬行而修辭兮覲可憑以報 國亂曰
已焉哉俟河之清壽難祺兮矧余多疾苦莫支
兮願假數年畢吾志兮持以告帝無茲生之爲
累兮

刺舟賦

昔吾遠涉庠江淮兮凌煙波而望洋鼓吾楫以
刺舟兮跂余進於帝鄉瞻帝鄉之沙漠兮歷日
月而彌遠儵夷險之屢更兮增余心之煩懣夫
何道岸之無涯兮孰延佇而可能欲舍舟而登
陸兮恐西北之無朋相尼軻之矩矱兮曰知行
之竝進遡精一之心傳兮迺發源於堯舜胡近
代之高賢兮厭舊說之庸常啓捷徑以超度兮
改權槩而稱量嗟聽察之不審兮紛總總而扇
颺聚生徒以授受兮欲家諭而戶說音稅叶如字縱
陸路之卽安兮或臨岐而改轍彼西北雖多朋

今非唐虞之真訣吾聞夫知之非艱今行之惟
艱徒口說之謾騰今竟逸駕其誰攀吾寧棹舟
而從危今遵前人之故道將修辭而立誠今唯
躬行以爲寶覽先正之講論今罄幽微而傾倒
所貴後生之善學今在浮游之盡掃稽夫人之
所蔽今藉空言以終老挾茲術以出處今唯日
求乎速化叶平聲薄遽玉之卷舒今效子雲之龍
蛇非窮途莫可進今終不樂乎迴車逞高談以
沒世今世猶惑其芬華望帝鄉其目遠今吾焉
取於浮誇吾令榜人進楫今并揚帆而盪槳使

長年振柁兮天風助遊乎滉瀟計至止之有期
兮洵前言之不爽庶初志之克酬兮吾何愧辱
頻仰許曰泛舟滄茫紛浩蕩兮遵彼貞途指所
嚮兮累日待濟毋快悵兮道岸可登終不失望
兮

梅花賦

睹萬木之品類羨茲樹之清奇初移種於漢苑
漸繁植於隋堤唯浮羅之松間益播名於厥時
爾其貞元交會物序驚催衆芳皆落此花獨開
早則破於臘前晚亦應乎春回秉凌寒之勁節

作百卉之先魁洗鉛華之塵色見素豔之真胎
或在江邊或臨嶺隈或橫月觀或遶風臺冰肌
裊襲踈影徘徊精神傳於墨客詩賦動乎吟懷
豈人情之有私抑物類之招徠吾想夫高士幽
棲山谷是託無心朱紫可伴寂寞故能勤石湖
之作譜費東山之商確豈共牡丹芍藥以爭妍
實與蘭芷蓀蕙而成約堪作隴人之贈卻訝梁
臣之謬責也何不佩於楚之騷人而爲晉徵士之
見略更有脩枝老幹歷歲不彫絳跗青實和羹
可調比桃杏而增貴偕松竹以締交彼閑花與

野卉空過目而蚤飄願吾徒之共勗唯務實以
相要

蚊賦有序

萬曆改元歲在癸酉余避暑于南湫書
莊是夏蚊獨多晝夜不得休息因憶歐
陽公云嘗作憎蠅賦蠅可憎矣尤不堪
蚊子自遠嚶喝來咬人也遂作憎蚊詩
余今易之以賦賦曰

蚊之爲物也一軀藐小六趾昂藏口帶三鍼翅
軒兩張其來孔捷其去復揚飽若櫻桃之重實

飢如柳絮之輕狂當夫朱明啓候薰風薦涼或
吐母於鷓鴣口或羽化於水旁擇草樹而託處尤
彌滿虜南邦方其日倚崦嵫暝色在戶千百爲
羣豫集簷宇聲殷殷其如雷勢薨薨而若雨主
人且宴息于中房掩絺帷而交股不揮筆以爲
安謂斯蟲之莫侮夫何一伺隙以潛入漸增加
於莫數展轉不寧且驅且怒兩手交拍而濡血
若染腥臙於塵土彼蜚蠊猶可防詎茲物兮相
伍然此特幽闇之時吾無怪其爲苦也至若赫
曦上晉萬室當陽主人厭永日之難遣或假息

於胡牀展斷楚之文簟將夢寐乎羲皇爾乃奄
忽而來如有告報窺忘乘疎肆其虐暴拂面嚙
膚就睡輒覺嗟高枕兮徒設胡黑甜兮足道憐
江南兮美景唯平望兮尤開似白晝大都之中
劫吏奪金而爲盜也想夫畝宮環室甕牖繩樞
明遠日月淺迫薪芻欲焚無藥欲障無幘因可
欺而欺焉曾何間乎窮民與貧儒獨有高棟層
軒廣除巨室敞虛明其莫容縱至止而難匿然
而來者之稍稀匪云種類之盡殫譬則唐虞之
世羣賢秩秩尚有共工驩兜逞其儉壬而猶待

夫放黜也尤忌文身殊為刺骨

叶訣律反

頓成斑瘳

頗費搔抑噫嘻蚊乎利甚鏃飛風成市集有翼而不能戾天有鍼而不能砭疾但充已腹殊無一德彼蜂虺之含毒尚醫師之見拾視營營之蒼蠅蒙讒名而罔實徒令人子不驅以為孝貞女露筋而野卒既與鼈而相讐復類虎而加翼豈乏孫謙之屏風難為趙炳之道術春暮早出深秋未藏為生民半載之害使貼危而彷徨安得焦冥巢其睫而滅目泰山壓其背而截吭者邪嗚呼天地生人以安為說何物纖微獨令吞

嚙世有肉食爲國謀顧亦腴民之膏血吾將叩
乎帝閭冀斯族之殄滅

四言古詩

有鳥

有鳥督農也其名布穀

有鳥有鳥載婉其音爾穀未布寔勞我心
有鳥有鳥其音孔嬌爾穀未布我心寔勞
穀旣布矣春旣暮矣匪春則暮伊緩之故
民事可緩我心匪澣爾穀未布及此春暖
爾有螟蟲予則食之爾有螽蟴予則得之匪予

得之爲爾植之

嗟爾之故予猶爾顧爾之從康伊誰之過
有鳥六章五章章四句一章六句

橫山

橫山築墓也時葬亡妻并穿生穴
業業橫山作鎮吳邑峻發中條七墩竝立
大墩維中爰逆來龍龍來自西蜿蜒其容
青鳥旣協元龜旣從迺作新阡寔曰大同
新阡鬱鬱在山之要卜之築之二子寔勞
陸墓在左崇墳在右交顧不偏允矣長久

既葬而母亦俟而父樂哉斯直混一今古

橫山六章章四句

河上集句

河上被薦書懷也

昔我往矣輜車鸞鑣載馳驅河上乎逍遙今
者不樂中心搖搖愜我寤歎日月其慆豈無服
馬汶水滔滔無思遠人以永今朝

昔我往矣兩服上襄載馳驅河上乎翱翔今

者不樂中心養養

叶平聲

愜我寤歎道阻且長何

以舟之淮水湯湯無思遠人懷允不忘

河上二章章十二句

苗碩

苗碩憂旱也築墓橫山目擊時事而作此詩

苗之碩兮望爾茨梁胡然不雨葉芸其黃豈無
桔槔湖水孔長

苗之碩兮成在旦晚胡然不雨葉翩其反豈無
桔槔湖水孔遠

湖之長矣不可量思湖之遠矣不可挽思心之
憲矣不可緩思

嗷嗷萬戶孰仰孰俯孰仰孰俯憂我父母
年既不順私孰與賑私孰與賑憂我田畯
食既不續公孰與足公孰與足憂我民牧

苗碩六章三章章六句三章章四句

樂府

朱鷺

伐鼓淵淵言邁于田田何獲獲朱鷺瑞應來昭
王度炎德若不加胡爲乎公路鼓皮急朱鷺集
願祝聖壽千萬年兜鍪不用干戈戢

思悲翁

思悲翁翁可悲河清不易邁人命難豫期秋風
颯颯入幕吹年老家貧當怨誰我欲出門去足
力苦飢疲朱門深杳莫控告歸對妻兒雙淚垂
壯年往矣勿復追蹉跎至此百計衰思悲翁西
復東年年轉徙如萍蹤安得丹鉛鑄玉容羲和
迴駕日再中陛下端居達四聰願因鞞鼓奏重
瞳

艾如張

衆鳥高翔翬繳何施有時來下順而取之羅旣
設復艾張雖獲如丘陵忍使皇心傷虞人虞人

勿復艾羅開一面仁風颺三驅古通禮何乃設
重防

上之回

上之回路逶迤祠祀畢神人熙駕玉龍駮文螭
出蕭關朝月支百官從駕疾以馳休噴道上共
具遲明年此日再巡幸當令滿地產靈芝

擁離

擁棘爲籬築室其中棘之擁矣自西徂東雖有
蘭蕙不如簾櫳五日一雨十日一風蓬草不蔽
孰知我窮何時撤棘均受帡幪

巫山高

巫山高接斗杓江漢深復道遙欲濟河無梁我心鬱以焦登山望鄉國淚落青布袍羈旅踰十年兩鬢生二毛東歸不可期歲月如水流滔滔安得乘風插雙翅翱翔雲路凌波濤

將進酒

將進酒娛皇情百醴洽旨且清祝聖壽億萬齡歌既醉樂太平陳湛湛戒昏冥

君馬黃

驪黃馬同逐誰識君與臣驪者色雜黃者純君

臣之辨良獨真君馬在前臣在後孽轡徐行各
垂手吉行師行自有程一日千里徒犇走霸王
異路從此分願君慎擇躋康阜

芳樹

相彼樹矣曄曄其芳下臨蘭池數十尺上有黃
鵠三兩行池水滋榮鳥弄嬌春風披拂生新條
含華吐芬耀人目百卉生妬安能逃佳人對此
樂何極卻恐良辰留不得草木會有零落期及
時甞勉崇明德

有所思

有所思巖穴高賢孰致之蒲輪纒壁誠不吝只
恐衡門泌水甘棲遲磻溪有呂莘有伊得之不
得興亡隨大漢定天下留侯爲帝師蕭曹及信
越竭力同驅馳誰云成治功而非賢是資大海
濱深山曲蒐羅不盡佳人伏雙珠玳瑁勤問遺
爲我皇家適百祿

關山月

關山月照征人黃沙白草年年春春來解甲秋
復著白晝鳴鉦夜敲柝樓中羌笛吹一聲徒侶
相看淚雙落關山月缺復圓閨中少婦只獨眠

他人離別豈云少唯我邊疆年復年

釣竿

伐脩竹作釣竿滄江之水清且寒水寒魚不餌
釣竿空自試爲我謂魚我非魚類日暖菰蒲生
吞鉤亦勿驚披裘釣雪殊有意不爲簑簪欲取
盈

折楊柳

折楊柳寄美人條牽絲綰情最真夜來雨過顏
色新蛾眉相妬增笑顰只愁飛絮逐風起官渡
無人空問津

平陵東

平陵東太守公鷹鷂逐雀雀不容何人挾矢來
張弓爲雀報怨高堂中一鷂被劫雀稱雄誰知
天下多晨風雀乎雀乎能善終

隴頭水

隴頭水四注下九阪高莫禿馬阪下水深沒馬
足驅馳那得如平陸關路悠悠迷故鄉春去秋
來一何速隴水東流無盡時征人安敢望歸期
表忠祠祭祀歌辭有序

予童時聞先君言弘治間崑山有黃司

訓雲者以文學名往來里中上舍王明
所識之遂相友善然不自明爲太常公
曾孫也豈時禁猶未除而諱言之與萬
曆改元 詔錄 先朝死事諸臣公首
應格會雷震馬鞍山公墓石出臺臬異
之乃奉 詔立祠郡中并祀姚守蓋姚
死與公同而豫爲竄籍以存孤尤大有
功於公也司訓諸孫彪來索歌辭持譜
見示閱之始憶譜中雲卽先君友也不
覺愴然爲賦騷體五章使歌以祀二公

迎神

蕤明燎兮灌芳求公神兮姚黃神之來兮下上
憶往事兮悲傷閱歲久兮禁弛際 恩命兮
今皇煥丹堊兮新祠妥雙靈兮差池虔祀事兮在
有司嗟鳧氣兮無不之吳若楚兮杳莫期奚問
玉兮埋何斯

初獻

稅雲輶兮戾止植干旄兮旖旎卽瑤席兮瓊筵
靈來降兮予喜薦明德兮維馨慕兩公兮典刑
扶綱常兮萬古曷有極兮清寧酌桂醕兮始事

祝陳詞兮神聽感
皇仁兮浩蕩續紛紛兮居
歆

亞獻

弭節兮吳城幸少駐兮鑒予誠君蒿兮悽愴現
光景兮昭明維忠義兮同好優聞見兮容聲載
歌兮再酌思九京兮可作我非公兮誰歸羌卒
爵兮康以樂美蘭堂兮可居勿遽翔兮寥廓

終獻

杳冥冥兮天昏願逍遙兮遲朝暾予有酒兮盈
尊且斟酌兮娛忠魂吳之山兮澤之水昔嘗遊

今樂只思靈保兮
憺忘歸僕停車兮
勿轡天門
遠兮亡期尚緩轡兮
委蛇

送神

神將歸兮予愁馳望瘞兮
不可畱東靈車兮送
往信翔遊兮九州儵時變兮
春復秋循令典兮
世無休奉祀兮予職駿奔兮
降陟神雖往兮焉
窮予敢忘兮匪敷靈謁來兮
帝旁祐
皇圖兮
千萬億

五言古詩

感懷四首

黃虞世已遠玄風邈難覲皇路多荆榛明珠委
沙礫偉哉鄒魯儒辛勤事梳剔不假王侯貴千
載垂勳勩遺言懸日月指揮何歷歷我欲揖至
人舍旃將何適事業諒非難所難在知迪盟心
求吾斯勿爲空戚戚

六籍開正路九流謾多岐世人循捷徑茫茫欲
何之豈云無至止榛莽多傾危何如向康莊坦
然任驅馳終當赴神都慎勿嗟遠而

荆山有良璧燦燦珪璋姿極模渾未雕世人安
得知良工不終誤美賈應有時所寶愧非真沽

哉何惜遲懷珍當自愛安用三獻爲

種樹東林下卷卷念桑梓憶昔逢早秋寒飈忽
然起本實雖未搖旁根乃先萎舉目清陰疎悲
傷曷能已矧茲歲云暮雪霰交如雨不假培植
功詎與松筠比悠悠勞我心朝夕敬共止

齋中讀書用康樂韻

草籍通金閨素心戀玄壑六載返幽棲養病耽
寂寞齋中多吟蛩門外堪羅雀顯晦應有時終
然謝妄作懶屬解嘲文親朋莫相謔幸遇聖
明君所悲非投閣于役勸來歸復此行尋樂天

意卽未知心期自能託

閒居效陶體

閒居謝塵事坐臥唯琴書素性耽寂寥陋巷良
自如蒙 恩入中祕翰墨清有餘旣無案牘勞
况有朋簪居藉此師友功麗澤當起予顧我牛
馬忝徒然愧襟裾年光易流邁荏苒霜露初寸
長無一得何以謝迂疎抱膝深自省寒月夜窻
虛

初至虎丘山房作

苦幃苦多病靜攝唯山房所幸情事伸離居亦

何妨假此水竹深便我來徜徉來時值首夏山
陰淨流光宇結青蓮幽榻借白雲涼南牖納微
風東閣迎夕陽一日復一日吾意與日長豈唯
釋塵俗更有草樹香幸逢暉上人共襲蘭杜芳
愧非名山客何以贈瑤章聊締方外交皓首樂
時康

題李掌教松栢長春卷

南山有松栢其幹挺以喬托根巖石間蟠結如
潛蛟旁枝何扶疎鬱鬱隨風搖側葉堪服食蒼
髯復干霄雨雪迨隆冬生意長不彫草木尚如

斯況乃人中豪之子秉勁節守官在江臯一經
授多士薄祿安閒曹執云苜蓿盤而不甘如醪
豈唯物性同更與山齊高古稱仁者壽河清諒
相遭何必王子晉聖謨良不謫

丙子六月作

一月脫兩齒吾衰難具陳看花若冒霧落筆如
蒙塵朱顏漸改舊白髮隨時新燕坐或構思荒
忽驚心神三立未能一虛度年六旬來日苦無
多榮名委荆蓁昊天若無意胡爲生此人聊且
溫故業修短任蒼旻

七言古詩

鞦韆

北州上巳清明時
深院沈沈晝日遲
美人暫借瑣窗暇
處處鞦韆柳外嬉
歌兒舞女推燕趙
每向人前誇窈窕
手挽絲繩足躡梯
長裾搖拽春風嫋
翻身轉手更迴頭
紅裾露卻金蓮小
蛺蝶飛來撲不開
相隨下上青雲表
寶釵墜地倩郎收
自說世緣何日了
粉牆遙望百花妝
空使少年心緒擾
本習輕趨登將壇
從今超距不爲難
但願胡塵千載息
不見軍書點木蘭

趙別駕惠龍鬚席賦謝

珍席產自廣之東
龍鬚芳草生丰茸
山陽日上黃金色
月高水曲翻溶溶
樵人寶此不輕折
折得欲售求良工
良工本是鮫人手上與天孫相比
耦編緝應居虎阜前
經緯不落蘄州後
迢遙千里故人歸
特攜見贈情良厚
展開光豔如琉璃
鋪向牙牀日已西
海底鬚髥不恒有
絕勝琅玕夏簟奇
北窓旣與塵凡隔
更起涼飈永終夕
臥來夢覺俱相安
知非華睨大夫簣

辛未新正試筆

隆慶五年

人生百歲今強半早謝榮名脫羈絆沈疴能令
宦業隳空悲壯志成冰炭歸田荏苒逾十年姓
名猶挂黃金案非無章疏懇乞休苦爲銓衡強
慰畱渥哉天恩思補報爭奈殘軀不自由旦
晚封章再陳乞聖心垂憫應不拂多士濟濟
盈明庭豈在區區樗朽物儻奉俞旨臣心歡
始終大節幸克完從今犬馬享餘齒毫髮皆蒙
帝澤寬蒼天若不相催迫暮景優游作閑客春風
歲歲入朱簾花落花開自朝夕願言黽勉三十
年莫把光陰謾虛擲

軒轅鏡

良工爲冶鑄赤金荆山之陽鼎湖陰炎煙騰上
高千尋鑄得寶鏡價比琛朝持入市人爭羨光
華的樂如飛電明珠博取懸中堂流蘇旂旒春
風轉廻環盤折琉璃毬威鋒可以靖九州世傳
此鏡功同鼎照悉神姦姦滅影託名黃帝騎龍
時鎔金范土相馳騁禹昔圖象來遠方軒轅之
說誠荒唐本無百物爲之備魑魅罔兩安肯藏
我聞清明作神聖況乃妖邪不勝正至人英爽
燭遺奸何須更買軒轅鏡

丁丑歲紀異

今皇紀年萬曆五暮秋己卯十二月澄清宇四際無
雲白日沈彗星下燭西方土光芒長丈從尾生
直掃南斗東向行經牛歷女日三度人情詢詢
傳相驚古來占驗原不一史傳紛紛總徒述况
乃訛言詎足憑思起君平與相質獨訝羲和尸
厥官錯言十月朔昏看明星有目所共睹胡爲
司者猶漫漫憶昔永陵當己丑龍飛八載
民殷阜臣方爲兒年十三曾見此星東北隅
偶維時政府屬永嘉張孚敬更張禮制實可誇但

嫌營構廩公帑卻喜羣黎無怨嗟方今天子
稟神聖師傅丞卿能輔政不知災異何由生疑
是天心仁愛盛爾民勿怖各安生一似先朝
樂太平修德弭災諒有道不須憂歲復憂兵

湖上集卷之一

湖上集卷之二

大明吳江徐師曾伯魯

五言律詩

旅懷

作客日未久還家念已頻
夢中長抱子雲下只思親
故里風煙別空齋劒鋏新
蕭條對紅藥疑是草堂春

寄送劉先生謝長興教諭歸閩中

先生嘗爲吾邑

訓導

西望送夫子離懷何可任
關河千里道師範百

年心榭葉侵官舫桃花滿士林歸與若相憶好
寄白頭吟

宿磚河驛

渡頭風色晴漁火隔沙明帆逐暮雲落潮隨春
水平長蘆昨夜月甲馬舊時營關隘今無事稀
聞擊柝聲

未夏同諸公讌集吳鴻臚池亭席上贈朱

戶部

時戶部奉使
徵江南通租

使事日蹉跎年華欲再過非關耽酒悞只恐厲
民多酌醴馴鷗鷺乘風弄芰荷醒來草封事猶

乞緩催科

壽醫士浦民惠五十

獨隱江臯上婆娑五十年藥苗春雨細丹竈午
雲連高席翔青鳥餘生伴赤仙看君有陰德應
見後人賢

送教諭吳先生致仕還進賢

拂袖賦歸去悠然守鹿門江頭羨高致館下憶
離菟桃李連吳越先生由蘭谿訓導轉今官風雲任子孫還
看雙鬢白重復拜貶恩

早秋

秋色清以切林棲更不同竹移初短日荻度早
涼風草閣避殘暑花堦聞暮蟲年華自如此何
必歎飛蓬

淨音爲瑞光寺僧賦

寂寞盤關寺春風獨鳥鳴禪心應不垢梵語只
無生擊磬空堂暝翻經業障清尋師問幽義共
聽海潮聲

送鄒大峻卿赴舉

年來不得意此去入高冥鼓鉞辭玄圃彈冠向
紫庭荻花舟次雨螢火馬前星應慰同袍者相

看眼共青

送費二懋莊赴舉

送子鳳城去杯光照夕曛昔年同筆硯此日各
風雲匹馬辭家遠千峰逐路分還憑捷書使來
慰鹿鳴羣

送曹大伯明赴舉

幾度金陵去茲行定不虛風雲秋漢迴霜月曙
鐘疎枕上占佳夢舟中理舊書歸來稱得意共
話十年初

送沈大价甫赴舉

之子辭家食行遊，揖鳳凰停車。山月白，策馬楚雲黃。泮水更三葉，京幃共幾場。鄉書容易達，豈必獻長楊。

送徐大子文赴舉

君去丹陽道，翩翩跨玉鞍。屢遊還未壯，登第亦何難。槐雨征袍濕，星河佩劒寒。鶚程風日便，詎畏羽毛乾。

送周二仲仁會試

仗劒出門去，悠然天地寬。江空片帆遠，歲暮一身寒。壯志欲陳策，窮途卻拜官。看君抱幽度，不

惜此行難

渡同川阻風宿顧侍郎祠下

早發同川路依然宿故城人家數里近風浪幾
時平沽酒看山色留燈見客情喜逢祠下宿不

見晚潮生

侍郎著玉篇于此地嘗叱潮使退土人祀之稱為喝潮大王

遣家僮入山採薪二首

饑饉入三吳人煙半有無聊憑採薪業暫寄養
生圖月滿空山路雲移宿火廚我將從所好遣
爾學樵夫

泛舟乘暇日持斧惜芳春豈不愛桐梓遙知翦

棘薪孤雲隨去鳥落照恐歸人爲說看綦處悠然隔世塵

送孔司訓先生掌教贊皇

闕里最稱賢因知聖澤縣轉官當此日分教已多年挂席孤鴻外燒藜尺雪前唯予廡下士臨別思悽然

風急

不厭江風急直爲山雨愁停橈誼古渡吹笛上新樓敵冷唯須酒安貧不索裘更憐無裌者農事任悠悠

別業雨中遣懷

寥寥居石丘一似輞川頭
雨久秋成慢田低春
務休期僧長不至對酒復何求
邯鄲蓬門外年
光逐水流

前詩有輞川之句感而再賦

不是王摩詰休論似輞川
徒然耽野趣終有愧
前賢宿火防炊黍尋魚欲放船
自憐蹤跡眇懶
作畫圖傳

送舅氏之任松陽

載詠渭陽吟悠悠勞我心
不辭山縣僻那惜越

江深閑閣松陰合懸符斗氣侵遙知善爲政應
有辟書臨

贈能上人

上人雖以沙汰養髮然終無室家有戒行

浮蹤辭寶刹高意入真如斷酒持師律安禪解
佛書江湖一身外衣鉢數年餘擬結林中社知
予宦况疎

燈下讀書

寒夜親書卷燈前揖古人味長嫌漏短道在識
情真魚豕批譌字丹鉛拂舊塵徒然稱誦法可
復過先秦

過責也賈誼有過秦論

贈傳神師

兩鬢欲星星雙瞳徹海溟妍媸懸水鑑儀像儼
丹青莫引明妃怨還圖傳說形 聖君如有夢
早晚入延英

志山爲凌五賦

吳山看不盡獨有志峯高豈爲形容峻由來姓
字豪白雲連北斗青嶼壓東臯君去棲幽跡遙
知有勁操

過華嚴寺詮上人院用周太宰韻

水寺依東郭松堂印塔陰鶴巢千劫樹雲伴一

乘心益國風流遠支公慧力深定餘詩更好時
望寄長吟

友人惠鵝

山陰今有贈不爲換經來價比馴鷗重羣將落
鴈猜線頰宜臘乳雪羽拂寒堆與爾甘寥寂無
心羨鶴媒

八石詩爲錢山人賦

石池臨字

古蹟多神品臨來喜逼真相看流水意便是寫
經人掃素雲根動凌波鳥跡新知君洗研處應

有衆魚馴

石林誦詩

大雅久不作君今誦若何相逢鄴下客同聽郢
中歌冥思雲霄迴芳音律呂和坐看綳帙滿不
待歲年多

石牀撫琴

暖風春戶寂新月夜牀明玉匣常不閉朱絃時
自鳴竹間調鳳律松下瀉泉聲誰是南溟者相
期遊太清

石室圍碁

地僻往還少香車時一尋且因開故局詎未息
機心矛逐松花落枰移竹嶼深坐觀星斗散疑
是晚庭陰

石竈烹茶

山廚非玉鼎真味卻悠然汲水龍湫上搜珍穀
雨前雲浮花外碾風度竹西煙不羨高陽醉知
君識最賢

石屏學畫

彩毫疎雨潤素幃白雲平花鳥自生意江山無
遁情冥搜入千里遠眺徹雙睛留得滄洲壁應

傳萬載名

石亭看竹

獨對此君坐清陰長滿身還除蔣生逕莫笑阮
郎貧月落疑龍去風迴怯鳳馴高棲不可極空
望綠雲屯

石枕長臥

世上已如夢山中日更長晏眠銷白晝起坐憶
黃梁犬寂門初掩雲深榻正涼睡魔誰爲遣移
席但焚香

鄒三起東挽詩

丹旌去欲迷落日果園西
几上青山小門前綠柳
萋華簪屬兒子鄉進士崑綵筆脫天倪
外史修新誌應添藝術題

宜興喜得太平謝大甫解希文二同年書
兼懷李子化

不道江南路雲山隔萬重
短緘能自至良夜若相逢
慰我孤蓬跡懷君雙劒鋒
鄉邦有范子肯與一登龍

龍湫

迴合千山裏靈潭忽自開
雲沙洗秋月人語動

春雷濯足聊歌詠乘舟且泝洄留連不能去莫
惜景光催

君陽洞

攝衣臨絕谷綠水正潺潺不到洞中洞那知玄
又玄山分見日月石斷接雲泉別有躋攀路冥
冥見遠天

玉潭仙院拾鶴翎偶賦

玉潭有孤鶴翎落仙山阿
裁細裁番罽紋疎織越羅
清風能自舞白髮不相過
何日成新篋翩翩
周易釣簑

送陳僉事督學廣西

清秩推南省霜威肅外臺遙知一人化重向
百蠻開夜月親鈴槩春風拂草萊憑君問屬吏
誰似柳州才

送王判官赴沅州二首

二月梨花雨送君清路塵王程應莫緩民瘼更
須親潭樹舟前合湘雲郭裏新丹砂不可鍊終
是宦囊貧

之子龍標去春帆渡五溪祗聞晴鳥喚不見暮
猿啼蜀水循城合明山入戶低天書召良牧

先到夜郎西

題侍郎康公風木圖

徒有臯魚恨其如負此心宦遊驚歲晚鄉夢入
春深埋玉人何在披圖淚不禁唯應三世
奉以答徽音

崔教諭壽詩

代人作

壯歲曾搖鐸中年卽掛冠青雲如有待

子宗堯進士

白髮共相看飲酒宜偕老橫瑟賦考槃遙思開

壽域新寵下

金鑾

竹泉爲慶成王世子賦

石壁曾題處依然竹徑幽清連沈繡戶綠篠映
朱樓世載東平德時開北第遊遙知禮賢士門
下有王猷

題廬陵王翁復齋

一悟天根祕高齋揭此題自知心不遠應笑世
皆迷曉滴清霄露宵然太乙藜羲皇如可作白
日到幽棲

詠太液池鴈

閣試

一別瀟湘侶來遊玉螭河影翻仙掌月聲徹
御絃歌暖浪乘春浴晴沙候曉過豈無霄漢翮心

在戀 恩波

寄題李貢士杏山書屋

何處山中屋疎籬繞杏花地臨丹壁近人接錦
坊華樹色連三月書香共一家

子蒙與予同明
爲庶吉士

年曲江上重看醉流霞

送楊鴻臚伴送琉球使臣至閩中便道觀
省

萬里滄溟使南還仗漢臣去看三輔雪歸近八
閩春符節通殊俗烽煙慰老親憑君問桑梓多
少舊時人

送陸二十八同年出守潮州

才望藹冬曹，朱輜出漢朝。
不辭州郡劇，那惜海天涯。
蜃氣開清晝，猿聲度短宵。
總爲風汛地，軍務亦須勞。

遊金澤寺

乘春遊寶地，數步入雲峯。
野曠村塵遠，山高石磴重。
烽煙侵古殿，雲水雜高松。
禾黍君休訝，禪宮恨轉濃。

贈崛峯僧

已入招提境，何妨鑷髮遲。
江湖歸未久，山寺住

多時月共禪心朗雲從浪跡移生公如可作知
爾定相隨

贈應醫士

君是明州彥高蹤寄澤濱午煙丹火伏春雨藥
苗新起死功多捷論交意更親他年脩邑乘應
傳寓賢人

同羅龐二使君同年太虛樓燕集

越市藏清絕危樓倚碧天湖山窮遠際城郭見
西偏雨舫遊人瑞亂後遊者絕少花樽使席專酒中無

別語憂國共拳拳

送魏三敬之給事奉使冊封兼捧恩命歸省

歸覲承恩使南行路不寒禁中三載績堂上
百年歡錦節明河漢花牋織鳳鸞南山今有賦
正及侑春盤

劉文安公考終十詠

誥加一品

贈太子太保

龍章來鳳闕寵贈照乾坤未拜生前命猶頒沒
後恩雲箋一品貴玉軸數言溫何必論喬木
華堂有誥存

祭錫四壇

舊例尚書致仕者祭二壇朝廷以公在經筵久有啓沃

功特賜四壇

遭逢良不易寵卹詎非難講幄承三主明禋

錫四壇絲綸傳閣使俎豆出庖官遙憶泉臺裏

猶多聖澤寬

優崇贈諡

山右台星隕天邊異數并旣加東府秩載錫

太常銘阿保知崇德文安美易名莫言恩寵

盡身後有餘榮

再建表坊

巡按御史以公爵齒德俱尊為建達尊坊又以公起家翰

林而叅贊南京機務
再建文武爲憲坊

閭門信高大繡使復明楊位望稱三達聲華憲
萬邦新題初樹表舊闕倍生光海內應誰竝遙
知冠一方

科第傳芳

公家前後登鄉科者八人舉進士者三人而公獨及第云

昭代稱儒族

公曾祖教諭

名藩頌德門賢科周八士

宦業宋三元謾說簪纓盛還看子姓蕃箕裘應
世續遺訓至今存

封丘沐寵

卜築勤 天使新阡蔚鄧林位更三館貴 恩

及九泉深入獸刊山石松楸閉夕陰因思桓子
柳徒費一生心

集類詩文

公有詩文集四十八卷四書
尚書講章八卷奏議四卷

中原稱藝苑公譽更超然射策人無敵遺文世
共傳錦囊天府祕寶集葑門鐫公集刻此後
魚鴻便應須寄一編

亭藏制誌

幽山亭子在箇箇記

恩私綸綍

天朝命文

銘太史詞貞珉殊不朽飛宇亦云奇他日登臨
淚應過峴首碑

別業私祠

昔年遊釣處今日奉靈筵堂上瞻遺像齋中育
後賢短牀留舊笏常祭藉腴田更有黌宮祀相
期永萬年

鄉賢公祀

朝著欽先達鄉祠重昔賢典刑宜百世血食自千
年漫比楊侯社還分孔席籩芳魂如有在日日
聽歌絃

玉晨觀

攬盡三峯秀迴車到玉晨煙霞隨地有泉石與

山均種栢何年士修仙上世人吾衰厭塵俗訪
道欲棲真

送施衛幕赴松門

結束有吳鉤
囟囟事宜遊
鯨波連歲滅
蜃氣逐春收
坐嘯牙中將
彈棊幕下籌
知君多暇日
望海數登樓

題吳山圖壽吳明府兼賀得子

代人作

吳山不可極
遙接峴峯青
未勒羊公石
先瞻傅說星
風雲看鳳轂
歲月度龜齡
獨有稱觴意
悠悠入畫屏

友人攜榼之湖濱燕集

湖畔春光勝晴遊樂事兼綠柳芳草合翠筆亂
山尖風咽歌聲細花催酒令嚴夕陽歸正好莫
待夜厭厭

金山寺

浮玉江心寺登臨意渺然客帆收北渚佛日照

西天

凡寺多面南此獨西向故云

須信迴瀾力長吟插影篇

唐韓垂有插影浮雲間之句近世楊狀元慎品爲金山詩第一

病中來過此直

欲借雲煙

海嶽樓

江寺憑高望滄溟杳靄間潮平歸大海雲盡接
衡山樹杪春濤濺樓頭曉月還辭官吾有意病
裏叩禪關

守恒詩

有序

倪端本諱政嘉善名醫也往來江湖間
治人疾多有奇效嘗扁其所居之室曰
守恒騷人墨客題詠甚富端本旣沒而
其子某猶不忍忘復來索詩予乃追爲
之賦

舊聞倪處士肘後繫青囊但悟存心訣如傳續

命方高齋閒點易鄰境遠浮航留得箕裘子年
來藥倍香

虎丘千頃雲

新堂在舊峯僧引駐行蹤白石雲千頃平疇錦
數重畫遲天界淨春暮野花穠佛國應非遠談
禪覓正宗

雨霽登山

宿雨今開霽悠然風日良放舟新漲綠著屐舊
泥香雲樹千山合煙蘿一徑長明朝有餘興重
舉泛湖觴

舟中賤誕張四子華以瑤篇見祝敬用奉

酬

南山對酒卮見贈辱新詩畫鷁探幽遠朱簾駐
景遲江湖真浪迹廊廟豈忘時五十慚虛度疎
慵負所知

重過治平寺謁三賢祠徑多落葉因誦唐
人黃葉前朝寺之句遂用爲韻五首

古寺依山麓新祠帶草堂小池涵漢碧叢菊散
金黃禮佛霑花雨懷賢惜棟梁文章僅餘事聊
以藉傳芳

初冬陟珠林滿地鋪殘葉歲運有四時空門歷
千劫我來聽梵音何處尋王業懷古識興亡因
風唱三疊

長憶楞伽院重過隔兩年逢僧還問字供茗卻
談禪沙鳥落天際風帆拂几前那舟有餘思回
首望雲煙

松下逢僧話行行一徑遙入門風日好就坐俗
塵消數里山迴合三冬境次寥晚來溪上望卻
恨越王朝

閒步湖上橋謾尋湖上寺門無遊子車壁有前

人記寶匣襲多羅金光緣舍利叅禪雖未能已
把榮名弃

立春見雪二首

何意豐年瑞霏霏正立春曙暉纔送臘淑氣未
催人漸覺餘寒重還看積素勻來朝太陽出物
候一時新

臘月不見雪逢春雪更微未論占有歲聊足慰
無衣點點鎔茶竈蕭蕭灑竹扉林泉饒逸興荷
笠坐漁磯

鯉湖詩爲沈山人賦

此中堪遯世煙水萬家村曉浪侵吳市春雷動
禹門魚龍多變化日月自黃昏莫問三江口鴟
夷迹尚存

贈閩中遊客鄒岱峯

閩山棲跡近代嶽寄愁遙小篆窺雙李高吟協
九韶洞中頻弄笛客裏數鳴鑣更有長生訣憑
君問子喬

題南昌萬地師訪譜卷

南服仙源遠西江別派多青囊探祕訣黃卷發
賢科訪譜春帆挂尋山晚屐過非君美無度若

爲費吟哦

壽近竹袁封君

吳市尋高士唯君少俗心
書香傳子弟隱跡勝山林
仙島琪花發鄰家竹徑深
倚樓吹鐵笛時協鳳凰吟

新正三日與翁大攜榼尋梅
梅尚未開詩以問之

把酒問花神春回已浹旬
如何江畔樹未愜望中人
幽意從君醉清芬入夢頻
他鄉誰早發先見歲華新

授產論兒并示此詩

薄業聊餬口謀生詎足歎敝袍吾不恥陋巷爾
須安章句求通易交游慎擇難及時當努力莫
待景光殘

春雪

蜡月微見雪新年雪轉頻雨嫌冬甲子寒勝臘
庚申卜歲愁多水看花遲半春獨憐婚嫁畢遊
賞任吾真

懷山詩贈施大

城市非山谷高懷寄興同望雲千岫合觀瀑一

泉通想像青連剎虛無翠滿空看君始衰白歲
歲領春風

題瑞芝徵孝卷贈御史邵公

廬墓憶慈親靈芝感孝純氣含麟塚秀色照總
帷新莫以天聰遠因知地道神更傳餐服訣持
壽百年椿

壽黃法師六十

真宮逢降節瑞雪舞芳筵悟得玄元訣修成碧
落仙玉簫迎法侶金籙引長年但願分良藥同
看日月懸

顧刑部道行以許墅別第詩見寄奉和

英妙纔踰壯如何卽倦遊慈親非待養
凌弟善調羞仕路從今始榮名在晚收
別離君莫歎努力贊皇猷

甲戌交年作

吳俗以臘月二十四日爲交年

明日嘉平節東風入戶頻

是月十六日立春

青燈照孤

影白髮度千春疾作停杯酌愁開識性真
憑誰問新歲安否任蒼旻

訪真緣上人不值

偶過招提境來尋石上盟豈知從定出卻作下

山行犬吠禪關閉
燈懸佛閣明
蕪詞在東壁
讀罷愧留名

代人題譽髦吳士冊

作士肩周德
傳經析漢箋
文章驚御覽
詞賦動人傳
門下多垂壁
囊中少俸錢
絳帷今欲撤
持贈愧瑤篇

得友人書

憶君高隱處
水竹閉深居
傲世彈長鋏
懷人寄短書
正思魚絕久
卻值鴈來初
擬棹山陰雪
還愁興不如

送人貶蜀

送子之西徼論交惜暫分
心旌搖夜月眉宇結春雲
鳥道天邊度猿聲樹杪聞
徵書旦晚至且莫歎離羣

湖上偶成四首

小隱南湖上溪橋帶郭門
檣帆窗外過簫鼓渡頭
誼散帙春暉永登樓夕照昏
鷗羣常下集相對竟忘言

郭外鄰家少依稀望遠村
結廬青嶂合種柳綠條繁
魚鼓朝開市樵歌晚過門
悠然絕塵想納

納任乾坤

生事日蹉跎荒郊但薜蘿客來唯設茗興到自
高歌囊底青蚨少門前綠水多只令衣食足富
貴欲如何

老病謝簪裾長耽水竹居門前芳草積林下故
人疎不揭張羅腸何勞問字車世情從落落懶
著絕交書

奉答周公瑕見贈

歲月思聞道徒然到六旬虛名嫌著迹壯志汨
風塵斑鬢朝慵鑷青燈夕慣親勞君贈高調落

鬼負陽春

再答公瑕集唐句

儒術豈謀身知予懶是真青山看不厭白髮好
禁春暮色生千嶂風光絕四鄰相知無遠近持
贈結交親

詠芸草

不是藏書閣徒然植翠芸纖纖怯晴日片片剪
春雲媚色臨窻透柔姿倩架分蠹蟲須遠避勿
嚙錦囊文

沈文學懋時廬墓

修文人已遠廬塚意何長
淚血枯蒼柏悲風振
白楊展書憐手澤辭舍
歷年光詎是忘慈母難
兄侍北堂

嘲醉人

令儀忘失度狂藥喜相親
豈不慕賢範其如中
聖人流連長夜樂飄泊
一身貧勸爾須剛制毋
耽麴米春

星槎詩贈王生

聞君解音律簫鼓泛樓船
豈必凌清漢渾疑在
遠天歌生秋浪裏席挂
晚風前予亦乘槎客虛

隨異昔賢

題畫賀朱山人得孫

佳麗說朱村湖山對草門庭中留栢子堦畔長
蘭孫雜錦鋪仙苑清渠引慶源丹青描不盡唯
祝後昆蕃

陳節婦趙氏六十二壽詩二首

早賦栢舟篇今來雪滿巔于歸時未久秉節志
彌堅門掩梨花雨尊開竹葉泉旌書旦晚至
尤足慰餘年

奉帚期偕老牽幃涕不虛淒涼一生足荏苒六

旬餘鏡匣塵常滿
機窗月自如貞心
能感物靈鵲下
庭除

喜得第二孫

重見孫枝茁姝慚
說慶門仰承先澤
厚衍得後

昆蕃果協雙熊夢

甲戌歲夢遇一熊前行又一熊繼之占者謂雙孫之兆今

鰥邗思兩鳳騫書香
能繼否今日且休論

雨中自遣兼懷石感恩

天畔獨登樓輕舟點
數鷗嶺煙迷晚眺簷
雨滴
春愁老計棲湖上交
情憶海圻鴈飛應不
到尺
素總徒脩

湖上集卷之二